

小
方
壺
齋

小方壺齋

藏俗記

新化魏祝亭著

西藏唐古忒三苗種也明號烏斯距益省數千里分野亦并鬼屬俗崇佛佛有三達賴喇嘛爲最其寺建布達拉山巔山西北麓磨盤山濟仲佛居之山東南琉璃橋東柳林內地畝佛居之隅建寺四曰別蚌曰色拉曰甘丹曰桑噶每歲正月朔六萃各寺僧赴大詔內攢詔旬有九日乃止小詔則經旬散攢詔者詔經也詔建自李唐樓三成寺縣建數里頂均溜金詔前有碣高二丈許豎唐貞觀年間後有海眼其上唐文成公主手植柳二半就枯此柳眉舒餘方吐絮無歲不然元旦跳鉞斧達賴喇嘛會番漢官宴選童十餘衣綠衣執鉞舞朔二飛神繩約四十丈餘繫自山屋頂蟬聯而下綴山麓石柱上番民短衣執旗胸護以生牛革自頂緣下頭與足異前後勢如輕燕掠水翻杆則以朔三寺前豎大杆一四圍橫互以繩令番民援之上下式歌且舞越二日攢詔至送崇日止送之日集唐古忒兵繞詔前演旋赴市候送走陰活犄角挽江卡付諸人以祓除不祥走陰活犄角者護法喇嘛也江卡稀紅袖二尺餘手挽作結也又集藏放排鎗旋打礮機發必面牛頭山礮大小不一大者鑄自李唐上刻字五威剿旋叛逆凡四尊先期設黑帳房於麓中令一人居之打之後拾其礮子送詔受賞子重十餘斤大如人頭僧以礮之中帳與否卜別蚌順逆不中是歲帖然否必叛翼日彌勒佛出巡隨以護法喇嘛儀從甚都回詔時馴象伏舞樓前葛家娃數十人裸袒揎拳交手撞摔以相戲噶布倫令十六以下丁斑服花冠數百騎競聘工布堂堂距磨盤山二十里許騎預集山足候神旋鞭驅如飛先至堂者錫以朱提厚甚番民效巧狀帽插輪音毛匍匐膝行遊人爭扑其臀以恣笑謔攢散之日諸們罕四噶布倫中教閱騎射耦以十八人或九或五不等馬一矢一鎗一畢賜哈達二廿七射遠箭擊優劣以遠近爲差中否俱勿論行賞與騎射同正月晦送瘟神藏古瘟地也驅之例自達賴始先期賈番民一作瘟神並裝神像是日喇嘛數十人衣飾以綵前綉鬼頭帽用

楮亦插鬼頭於上詔前躍舞久之瘟神自詔內出眾喇嘛厲聲誦經響震陵谷揭五雷驅之山南其像則扛諸河干焚之季春朔質明達賴盡出其詔所藏付諸眾喇嘛披帶携下山抵藏市沿肆周遊亮畢旋寶房前漢番官俱坐帳前并將珍珠所綴袈裟以次傳下遞覲之謂之亮寶時則達賴喇嘛坐詔門遙望繼下山遊騁竟日過此以往達賴肩坐詔內晨夕誦經罔敢擅動小扞格眾即繩以法其下肆行無忌亦莫之禁位埒達賴者諸們罕也總理寺務次則四家噶布倫司理藏財餘有噶厦等官浪子轉蠻牧令也藏外胡圖克圖亦蠻官番人敬事之亦同佛外惟蒙古信其教最篤攜黃白物往來均效塔爾行名曰朝山朝活佛朝之人馳紛繹絡草地青海等處距藏萬餘里跋涉經年踵相接至則頂其金以獻得見達賴榮甚否則歸家烝饗所有復詣詔內塔砌溜金樓鑲珠寶皆蒙古所貢也藏地平衍南北遙四十里東南廣延五百餘里爲極西大都會自成都赴藏由爐而裡塘而巴塘山路崎嶇諸峯似兒孫者難計以億大山七十有二高推丹達瓦合最長險莫若賽五合鹿馬嶺諸峯樹則杉柏黃楊黛色參天嶺峻處叢密尤甚叢山爲番牧所均支黑帳以蔽風雨草盡又移宅他山地稍平處則構屋屋頂皆平泥以土或雜以牛中黃無牀幕帳枕寢處與牛羊共食惟有青稞一種漢粃子也播以春季仲秋穫之節屆白露霜與雪俱降雪多則爲稞害歲卽歉收間有燕麥味均遜內地美蔬種圓根漢蔓菁也夏末舉其食所餘者曝焦極爲嚴冬喂牲備王瓜種自蜀去先一歲種之巴塘始移藏實放結否則花虛炊用牛糞隈山處亦閒以柴草烹茶飲貧富皆珍之故屋皆置茶桶鐵筒勺諸什物飢時熬水和茶置桶內加鹽酥油攪之和糴粃以食亦或食牛羊奶子奶汁懷各挾木盃無箸食畢舐以舌仍納懷中酒皆青稞所釀呼爲沖亦曰噲淡與酸并服飾諸番無甚異打箭爐番人冬戴狐皮狴狴帽夏用棉腰左佩短刀嵌以寶石穿左耳帶珊瑚松石大隊表著白毡子及毛襪襪襪巴足韃以革番名爲康貧者赤足亦或服生羊皮冬夏無二色耳

帶錫鐵隊識字之番腰繫小鐵筒置竹簽於內或以小銅盒與漆盒貯墨瀋書則以簽蘸之席地置膝上
自左而右橫書婦人衣服與男同頂髮平分以紅哈達互交之中列銀鑑珊瑚松石密蠟後懸碑礫如髻
狀所著亦康裡塘婦首作小辮百餘披下頂上粘羊絨數點巴塘婦結兩辮中聯一紐餘俱與爐同准噶
布倫首罩珍珠網頂上珊瑚松石滿焉俗皆不著中衣晨夕不齷面藏則禮佛人多閒淨面男女甫生身
周抹以清油曝日中故雖嚴寒不著寸縷亦能蒙犯霜露無戰慄狀俗不重生男女則喜以長即可作人
作漢言嫁也喜作漢人漢置其處者蜀滇秦人居多成婿不待媒灼言兩相悅登即合目偶反立分析所
生男也許漢人攜歸流落者目爲車蓋娃又名半個錢性喜淫已作復與人通且以其所私之多寡奪於
眾女皆開嗆房假賣噲名爲勾欄所尤甚者除生母及女外胞兄妹亦通之年耄娶少艾諸子烝之絕不
以瀆倫爲嫌昆季四五人同一室和睦無閒言眾稱其了頭能不絕口路遇了頭不相識驟與語備極淫
謔喜甚俗不置廁旋解俱在市衢男女對旋恬不爲怪市中腥氣四塞職此之由凡番男女幼均教之蠻
曲名跳歌粧夏秋間赴柳林中躍歌恣樂遊人邀待宴徑就不拒六七月間均赴河浴少亦五六人結伴
往皆赤其身以濯男女絕無避忌入死攜其衣服什物赴市鬻之以所得刀布爲懺度費葬有三曰天曰
地曰水富家扛謁寺前剛飼鷹鴉天葬也次則縛負河干剛飼犬地葬也各有剛臺最下者水葬亦負之
河側剛以飼魚剛畢袋其骨攜歸擣研之置火藥內故鎗礮聲作聞之者氣悶甚剛俱交再頭經理酬以
費不等大葬者給頗厚至夾壩充斥之區從麻蓋接巴塘界中約八百餘里林深木茂處皆是焉夾壩漢
劫盜也樓峯汎劉朝相得藏差駐四載爲予言之甚悉天地水三葬唐古忒惡俗也乾隆年間周明德官
蜀時嘗隨福郡王康安入西藏見之乃稟駐藏大

臣出示體諭此風漸改
今惟後藏番衆尙有之

西招紀行

蒙古松筠著

藏地各屬設有營官第巴管理向不知撫卹其科斂一切於民力能否從無理會盡竄已久達賴班禪不知也乙卯春聞知我○○皇上普免天下積欠錢糧始有蠲免番民糧賦之請奏入我○○皇上深爲嘉悅賞銀四萬兩撫卹唐古特百姓並○○諭衛藏所屬在在窮民查明槩行卹賞前後藏招集流亡番民給予籽種口糧各歸本寨安插力作者共予有一百餘戶俱令三年後再與達賴班禪當差錢糧既賑之後尤宜休養生息余欽遵○○訓旨恪守章程太菴閣部分辦南北兩路卹賞余往西南巡邊

衛藏西南一帶

例應兼理賑濟

邊地固應示以威儀然西藏之烏拉非同北塞蓋有馬之家最少其俗每遇大小差則有馬之家出馬無馬之家按戶攤銀若干以爲僱價是每馬一匹已累及衆人及有倒馬一匹又須賠銀至數十兩之多舊俗如此固難盡禁雖官爲賞價亦不應過多致有居奇故差無大小皆宜輕騎減從庶免番民苦累自前藏西南行一日宿業黨又行一日宿曲水曲水者東西雙溜紆迴湍激故名此地東來之水曰藏江其源出拉撒東北西來之水曰羅赫達江其源出崗底斯雪山二水匯此曲折東南由工布入南海崗底斯卽所謂驚嶺是也山在藏之西北極邊薩喀呵哩布陵境上曲水形勢險固有兵數百雖萬人無能踰越地多農民有糧草可守可戰

由曲水前行三十里過渡有皮船此外另無渡口雖有鎖橋僅三繩惟土人入行之他有過往須用船渡此卽羅赫達江也南岸有廟巖峯狹徑步履維艱亦一要隘

自鎖橋前行過一大嶺復越高峯長約二十餘里凡五十里至巴則嶺南有大海子番名洋卓雲角嶺頭高聳路徑崎嶇旁臨海子是又一要隘

自巴則宿白地又宿朗噶改過宜椒大山宿春堆次日始至江孜汛有守備一員漢兵二十名番兵五百名一律較閱其鎗箭陣勢頗爲練習 江孜田肥約有數千頃民生尙覺饒裕西行二日至札什倫布

自江孜南行七日至帕克哩有正副營官二員邊外與布魯克巴部落交界該部長曾於雍正十二年遣使入貢○賞有額爾德尼第巴之印人頗恭謹崇黃教世與達賴班禪通好其部西通廓爾喀境內道路平坦每貢象馬皆由布魯克巴送入帕克哩 帕克哩爲藏地南門保障西南界連哲孟雄部落其部人戶無多向與唐古忒通好西有大河名藏曲唐古忒倚爲險津要隘先是河西原有哲孟雄所屬人戶後經廓爾喀侵佔以河爲界蓋因藏曲水深湍急不能船渡僅有鎖橋數繩窳番無能踰越是藏曲旣爲哲孟雄保障又爲帕克哩屏藩此等情形江孜汛防官兵咸宜深悉

由帕克哩西行三日至于壩駐有第巴由于壩西行一日至定結駐有營官定結于壩兩處隘口相距札什倫布程途僅四五日外通廓爾喀最爲險要乾隆五十六年賊曾分兵擾至定結幸有戴琿番兵堵禦賊乃未敢深入其隘口扼塞較藏曲尤爲緊要所有在藏駐紮漢番官兵平時更宜深悉庶於邊防有益戴琿者總管番兵之官衛藏共六員其次有如琿甲琿定琿

後招卽札什倫布班禪所居之廟依山疊砌成樓如長蛇之勢頗爲堅固有兵一千可守可戰 舊駐漢兵無幾而向無番兵駐紮乾隆癸丑奉○旨添設漢兵至百四十名番兵千名都司一員統領操練頗稱健銳 辛亥年廓爾喀賊衆僅千餘人入自聶拉木走協噶爾至薩迦溝攻薩迦廟未下皆跣足步行深入無援而其火藥僅各有三出眾心已形疑懼乃探知後招無備班禪已避至前藏遂率沿途裹掠之唐古忒男婦頭上皆纏以布揚言眾萬餘進至札什倫布時僅有都司徐南鵬率漢兵數十名緊守營官寨賊攻不下恰有招集唐古忒之兵民千餘人與賊接仗敗之賊少退却正宜竭力攻勦況藏地毛牛最

多且有蘆草清油酥油如用齊田單之火牛陣以油浸草束牛尾夜晚燃之發縱撲賊我兵隨後擂鼓喊進亦必取勝而唐古忒統率之人不知紀律恃勝不備被賊乘夜轉攻番兵大敗賊眾卽入招肆掠而遁彼時如有現在之勁旅不但賊不能如是猖狂亦斷不敢如此深入余詢悉情形憶昔賊得生還者豈非僥倖也哉 余至後招與班禪會晤見其年少而通經性頗純素毫無塵俗之態聞所得布施不多積貯喜爲施濟所屬僧俗無不感仰此其能結人心之仁政也

由札什倫布走崗堅喇嘛寺過花寨子共行三日至彭錯嶺有大寺依山傍水森森然楊木萬株初不意此處竟能蓄材如此因而冒襟豁然諭令各處空閒所在多爲栽植亦敏樹之一端也寺東西山路凹凸陡險者數處雖無戍守敵亦弗能深入是爲天然要隘較之曲水關口尤爲險固

自彭錯嶺西行一日宿拉孜營官寨次日又西行十餘里入甲錯山無水草土石色盡青黑有瘴氣罡風陣陣行人五月尙披重裘焉 甲錯傍依雪嶺絡繹相連且途長行一日弗能盡越須於中途過宿次日

越大嶺始至羅羅塘是又一天然要隘

自甲錯過羅羅塘共行二日至協噶爾微有田禾官寨居山頂下臨大寺寺寨相依勢頗險固辛亥年廓爾喀入寇至協噶爾時寺僧頗有主宰協同營官等力戰堅守賊攻不下又以甲錯路險未遑直入卽由協噶爾東北前進走薩迦繞至後招深入無援急欲回巢因懼協噶爾僧俗截戰故不敢仍由原路自札什倫布走崗堅喇嘛寺入花寨子南首之轄布山溝由薩迦廟南繞至喀達隘口以遁喀達東距定結僅四日程此爲緊要關隘所有後藏定日各汛官兵咸宜知之

自協噶爾宿密瑪次日行六十里至定日汛其地本名第哩浪古新設漢兵四十名番兵五百名有守備一員統領操演閱其技藝頗爲健銳除江孜後藏定日三汛前藏尙有大汛遊擊守備等統領漢兵四百

六十名番兵一千名共計衛藏四汛漢兵六百六十名番兵三千名時常訓練可爲勁旅其番兵心雖怯懦要在講習作氣怯者自勇矣 定日汛岔路有三一西北行四日至宗喀自宗喀西南行三日可抵濟龍邊隘一西行二日卽抵聶拉木邊隘一南行三日可抵絨轄邊隘此三處邊外均與廓爾喀毗連絨轄在喀達迤西相距路程僅四日定日一汛可謂獨鎮三邊 自定日西行十餘里入通拉山風大異常寥無民居怪石陡壁偏坡流沙長約百餘里相傳昔達摩與彌勒曾在此山絕頂處鬪法云迤西聶拉木境內有塔廟名帕甲嶺廟側有石洞當頂一隙透亮內有達摩坐像是卽面壁處

自定日曉發行百九十里至巴都爾地方始有民居

由巴都爾過達爾結嶺行一日至聶拉木是爲極邊依山臨澗有小關門一座並無牆垣營官寨築於關門之外居民無多尙有廓爾喀所屬之巴勒布常川貿易者二十餘人此等巴勒布人本循良久與唐古忒交好甚爲安靜非廓爾喀可比聶拉木以外相距廓爾喀巢穴陽布地方路程僅五日山徑崎嶇巴勒布俗名別蚌廓爾喀侵佔已久盡爲所屬

由聶拉木旋走達爾結嶺西向宿義拉喇嘛寺次日過嘉納大山宿伯孜草地又宿拉錯海子南岸此一段水草頗

自拉錯海子前行二十里上鞏塘拉山走十餘里至山巔馬已疲矣旣過山巔路益陡峻有流沙馬步維艱真是天然險要蓋辛亥年賊攻宗喀未下卽不敢進越鞏塘拉者懼險之故也下至山根西行二里許路旁有一小山上有太寺名瓊噶爾寺後有泉亦係扼要之區

瓊噶爾寺南行十六里至宗喀營官寨後接喇嘛寺周圍有牆垣勢頗堅固辛亥年駐藏大臣派綠營軍功陳謨潘占魁二人同營官薩木珠等率番兵二百名守駐寨堡賊眾屢攻未下伊等竭力堅守每夜多

張燈火晝則歌唱自若故賊疑而遁回察木卡此兵少守禦有方之善已蒙○○聖恩嘉獎

自宗喀西南行一站宿哀達路險五月河水漲發時須繞越大山而行途間居民最少

自哀達西南行一站至卓黨有民居屋舍類內地草木茂盛有田禾

哀達卓黨適中有卡名察木此卡以內數里間有長橋三座廓爾喀於辛亥年秋佔拒察木迨至壬子年夏五月經前鋒超勇公海諱蘭察率兵進剿時賊探知大兵將近遂拆橋斷路會大兵乘夜越澗直抵察木賊眾五百一無得脫盡被誅滅是察木三橋寔爲保障有兵數百雖賊眾萬餘亦弗能越

由卓黨前進山明水秀其飛瀑寔勝於打箭爐之頭道水而兩旁間有山寺民居林木森然鳥獸蕃多凡八十里至濟隴爲衛藏極邊外接廓爾喀西南行十日可抵陽布番民大小四百餘戶地氣和煖一年兩熟原無防戍雖有正副營官二員不過僅知收糧斂賦而已從前廓爾喀入寇既至濟隴番民等無能敵禦竟自順從因察其故緣唐古特向不知撫卹百姓且以濟隴田肥多產稞麥凡有運貨至宗喀以內貿易者率由宗喀營官抽收牛糧各色雜稅實爲苦累日久怨生以致心存兩望於是宗喀等處百姓有背鹽赴濟隴易糧者該處番民亦卽私行抽稅分用其營官亦不之問此復成何事體因諭以○○聖主鴻恩及達賴喇嘛慈悲其濟隴宗喀互相抽稅一事槩行嚴禁並將兩處無名雜賦分別減免各發給印照以垂永久且有○○恩賞銀兩分別撫卹眾番民無不忻感叩謝○○天恩

薩喀東南界連宗喀西南與廓爾喀作木朗落敵湯交界北與阿哩爲鄰西北與阿哩所屬之布陵地方交界阿里乃衛藏西北極邊駐有營官二員邊外西北與拉達克汗部落交界由拉達克北行月餘可抵回疆業爾羌地方康熙年間準噶爾策凌敦多布曾由回疆經阿哩至藏滋擾是阿里地方從前爲西招要隘阿哩之西南半月路程所屬布陵地方駐有營官一員爲阿哩營官統轄境內有崗底斯大雪山相

傳爲名勝境外南與廓爾喀作木朗等處交界西與庫諾部落交界所有此一帶拉達克庫諾落敏湯作木朗皆與唐古特和好惟作木朗一部漸被廓爾喀侵佔迨盡此本界外之事與唐古特並無干涉然所有阿哩布陵薩喀等處邊民必飭交營官妥爲撫養以結人心可期永爲保障 薩喀草地無田禾皆遊牧畜牛羊以養生納賦地方寬闊駐有營官二員管理尙有所屬之桑薩偏溪兩處地方各有小頭人分管數十年來民多窮困幸境內北有鹽池百姓常往還行四十餘日背鹽赴濟隴易米以度日納賦余於濟隴道中曾見此等易米之人詢悉其苦況實屬可憫 薩喀早年原有百姓一千餘戶牛羊亦本蕃孳實因賦納過重人口日漸逃亡以致薩喀桑薩偏溪三處共止剩有百姓二百九十六戶人戶既少所畜牛羊較前止有十分之二查其應納正項酥油及抽收牛羊稅銀外尙有數千兩無名稅賦種種苦累民不堪命因憶及薩喀境內之鹽池久爲廓爾喀希冀此地百姓若不及早撫養或致盡數逃亡則鹽池未必仍爲衛藏之所有遂諭以○○聖主隆施達賴喇嘛慈悲所有薩喀百姓除應納正項酥油及二年一次例收之牛羊稅銀外其餘無名賦納盡行豁免並發給印照以垂永久仍飭令該處營官留心招集流亡漸次安業

濟隴宗喀薩喀三處百姓皆已減免稅賦其聶拉木絨轄喀達定結帕克哩阿哩等處番民租賦查明均爲減免並示體卹謹將辦理情形入奏仰蒙○○聖鑒允准是邊徼窮番盡得休養其生計寬舒人心自固

達賴喇嘛商上每年差派雜役繁多所屬種地番民一年交納各項錢糧外每戶仍攤出銀三兩至六兩不等名爲幫貼夫役盤費且有管事頭人以夫役折價而肥己者不一而足蓋此項差役係洒掃布達拉等處寺院及秋季割草應用而派因循年久遂爲定例其苦累莫此爲甚因查商上日需草束原有百姓

每年所交折色銀兩不但足敷割草夫價尚有盈餘儘可僱募以應洒掃之役此在商上不過微減浮費而眾百姓每戶一年省銀數兩則生計寬裕向之甘棄田廬亦庶可漸復本業矣

余行抵羅羅塘有番民稟訴每年商上及大寺廟差人赴聶拉木等處貿易百姓等應付烏拉苦累已極云云復查屬實而羅羅百姓因此已逃去十之六七凡有通衢大路及邊地百姓皆有此累是應卽爲嚴禁況貿易並非公事自宜隨處發價僱覓應用以紓民力

所需割草夫役洒掃寺廟人夫每年均有所收草束折色銀兩僱覓應用其百姓每戶一年難出之項永行停派至貿易者所需烏拉酌定章程皆令發價僱覓其唐古特大小各世家一槩不准私用烏拉各緣由均經具奏奉○○旨允行已遍發告示曉諭禁除積弊或恐日久玩生仍須查察耳

余自濟隴旋程經宗喀轉向東北走桑薩過達克孜阿木陵共行十二日回至拉孜在彭錯嶺甲錯山中曲水之上游也東南入山而逕至薩迦溝 薩迦廟距拉孜僅百餘里其呼圖克圖傳世最久打箭爐一帶土司

番眾無不傾心欽敬相傳爲釋教之祖釋迦佛曾出家於此而宗喀巴又從學於薩迦云其地方數百里百姓亦僅數百戶喇嘛不過千餘有田禾有水草僧俗頗屬安靜由此東北行三日迴至札什倫布 薩迦迤東溝內有兩處要隘一名曲多一名江鞏余詢悉從前廓爾喀經由此地潛入後招因卽築卡以爲防禦有警可由後招撥兵堵禦現今喇嘛住持雖似梵碣實作望樓耳 曲多距江鞏僅二里許勢頗聯絡迤東察隴地方頗出稞麥此地乃前藏所屬應令達賴喇嘛商上每遇豐年按時價陸續收買存貯大有裨益

余自察隴出薩迦東北山旋走崗堅兩日至後招旋程走生多喇嘛寺渡藏布河一帶山徑崎嶇行七日直至陽巴井德慶始見平陽沿途巖崗險隘絡繹相連自陽巴井行三日迴至前藏往復略地因繪全圖

以資查閱

衛藏百姓性行近古應撫之以寬惟僧俗番目多有貪婪而其跟役名曰小娃子往往肆意勒索百姓苦之因查出營官莊頭及小娃子婪索等弊隨即嚴處示懲以慰番庶

招西秋閱紀

蒙古松筠著

乾隆乙卯歲○○○高宗純皇帝發帑金四萬兩賑卹衛藏番民余周覽邊城凡所經行既著于篇洎嘉慶丁巳秋又因稽核賑務重閱招西徧歷佛地欽○○聖慈之廣被見民氣之已蘇偶述見聞以補前紀之末

前藏至業黨七十里

曲黨至曲水九十里鐵索橋換烏拉關門依山臨水 曲水唐古忒語曰褚滑褚水也滑漩流也

曲水至巴則五十五里 巴則唐古忒本呼巴孜巴峰也孜高也山根一帶渠似天然山陽有大海子番名羊卓雲角又名雲錯梵語錯海也環山四百餘里此地氣候較暖有兩熟者深秋始穫

巴則至白地九十里

白地至朗噶孜九十里換烏拉 朗噶孜本名那噶爾孜番語那鼻也噶爾白也孜高也白山鼻上疊砌

營官寨形似佛頭 西招山野深秋往往午後多風固宜早發早住 自巴則走白地至朗噶孜俱紆繞

海岸而行

朗噶孜至春堆百二十里 納錦濟科雪山唐古忒咸稱菩薩護法能怙恃行人故過往皆禮之 乙卯

夏過此時始行耕作未若今秋日觀稞麥豐稔

春堆至江孜百二十里換烏拉

江孜至白朗。里沿路番民跪獻糌粑土酒而此處尤多並習歌舞以樂豐年

白朗至後藏九十里換烏拉 恭遇○○聖皇萬壽聖節札什倫布供有○○聖容班禪近侍督領僧眾虔誦無量壽佛直經班禪年甫十六勤經典曉溫都遜且能與眾僧裸衣講禪可謂再來人也梵語溫

都遜乃諸經源流 如琤色楞能演一馬三箭 陞任都司戴文星素諳操防因○奏請接駐後藏

後招至崗堅喇嘛寺九十里 札什倫布迤西五十里那爾湯廟內貯全藏經版殿藏古磬一口爲鎮寺

之寶以細捶輕摩磬口音若笙簧右旋聲則細左轉聲則洪似此俗尙固不必信亦不可鄙又西南二百

里有薩迦廟皆經四五百年矣 沿途秋收豐稔細詢得悉崗堅附近有破雨雹傷稼者十數家因諭以

達賴喇嘛慈悲免其本年賦納復飭噶布倫遍諭各處營官查察倘有似此者一體酌蠲

崗堅至花寨子六十里 花寨子本名轄布格登番戶百餘屬薩迦 壬子夏大兵深入陽布時林觀察

偶督運糧糈至轄布大河水發難渡觀察捐銀建橋及前藏喇嘛噶布倫後藏歲琿模爾根堪布急公會

辦橋成以濟觀察即今方伯也余兩渡過此因誌之並題曰林公通惠橋仍飭噶布倫及歲琿堪布每年

動閒欸修補鞏固宜便行之

花寨至彭錯嶺百一十里屬後藏換烏拉 彭錯嶺山勢雄峻營官寨高居山巔而廟在山根近臨大路

廟東五里有巖道下臨崗噶 札什倫布迤西通衢有三左即薩迦溝前已相地○奏請動項置卡隘中

則珠鄂嚨路在薩迦迤北亦築長牆爲隘彭錯嶺又在珠鄂嚨迤北是爲右路中左既有卡隘右路不可

無防因令依山築卡以爲保障班禪僅費百金 營官寨在新卡迤西又居山頂自成犄角之勢中左右

三關如分屯鎗手數百可破萬敵尤在督率有方兵心有主耳

彭錯嶺至嘉湯六十里屬後藏 曉溯崗噶江源出岡底斯雪山抵嘉湯烹羊煮粥噶布倫札薩克喇嘛

卓尼爾通譯等一行居右守備等官及兵丁一行居左

嘉湯至拉孜六十里屬後藏換烏拉 自嘉湯西行十里許江岸有直壁番名日東巴登岸數丈僅容一

蹄臨江而渡 過日東巴數里又有大嶺番名科布拉辛亥年廓爾喀經薩迦溝擾至後招無敢走大路

蓋以重險之故 東南通薩迦西南達定日聶拉木西北經阿木嶺達克孜桑薩直通宗喀濟囉 乙卯年○○恩賞撫卹招還流亡今已漸次復業

拉孜至甲錯山九十里宿處地名拉布乙卯夏經此雨雪交加風冷殊甚

甲錯至羅羅塘百二十里 有波絨巴者相傳爲唐古忒大家世居游牧甲錯山陽有九山九河卽其東

界於此敬備茶矣 乙卯年○奏明曉諭凡商上及各大寺廟差往聶拉木貿易者自羅羅起所需人夫

牛隻皆令隨在發價其唐古忒世家及達賴喇嘛親屬人等概不准私用烏拉一一嚴禁今已二年詢之

百姓據云無復苦累矣 羅羅塘田禾有被霜者飭交噶布倫查明諭以達賴喇嘛慈悲量爲減賦

羅羅塘至協噶爾五十里換烏拉此地喇嘛有馬願與百姓同出應役甚爲踴躍

協噶爾至密瑪塘七十里 自協噶爾曉發西南行數里山名羅哩夾溝僅容一騎 有果瓊拉山釋曰

小山門爲協噶爾屏障 渡琿褚河盛夏漲發難渡

密瑪至定日六十里閱操壬子冬設漢番官兵今已成勁旅 京都健銳營習九進連環神火衛藏依法

教演三進連環及九子鎗無不準鼓而發 頻年奏入較閱情形屢蒙○○聖訓諭以勿久而懈欽承一

年一次 汎城居山有云山形類虎者因豐然熟祭實似龜非虎乃忻然爲詩以誌並書離龜永固四字

刻以藏武廟 汎城因故寨而建天然保障守備署居乾位戴琿寓守備迤西

定日至莽噶布農百一十里 定日西北有山隘駐定琿一番兵二十五名防汛 乙卯年由定汎行兩

日至聶拉木過嘉納山走伯孜拉錯始至宗喀此次詢悉聶拉木秋收豐稔番民樂業而定日西隘路達

宗喀且係戊申年廓爾喀入寇所經應卽查閱況路程與經聶拉木等騎從亦無勞頓 小憩嘉溥爾地

屬後藏過此仍係前藏協噶爾營官所屬一帶山潤草肥野有黃羊見人不驚惟懸足而聽緣唐古忒向